

Pitar

dwandfamo barkof gontwat

Barkof kfo nuhas mrokfom

Kristenm bok krhopam yakmoatm ndnatn Pitar rröh kfo bmtayuk mrokfom gontwat wandfakhato htafmorm. Gontwathu mrokfom kfo memor, "Kristenm Jisas Kraisru gutnius mrokfom dukefm htakfot. Jisas Kraisr nohmor. Nohhato tfit sinyamor. Sinyahato yura moun yuhat rim fnahnimor. Kto tfit yarim fnahnehato yawihnehato tafont htiyakrahmr tuhant yindars." Nd mrokfot tur kfo htanymort. Nd mrokfot yakitoh kihhato toh gari hasokfot.

Kristenm mirahko ka be rhu yindhorkfot wom kurhefen duha. Nhai. Nd krhopam Kristen yimaro toh nmbuharo mnhombrayuk nefem. Nd Kristenr wohsisrahr o nhai. Nd nefet. Mirahko ka tamoh nefet. Ndnetn Jisasr yakitoh kihhato toh bmtakfot. Toh bmta hasettn Jisasr niahato mhtiyaknerahrn, to be yakruharn dborioh rhu nmbuhat hirahrn.

**Nom Bro Nkifrarhu dborioh tuhannom yindarinom
tohwonom. Ndnetnomn nom be dborioh dborioh nefrpam
na hasohato nd nmoh yufampno rhuyuk
wuskamn be toh gari hasokfot.**

(Sapta 1.1–2.10)

1 ¹Na Pitaya. Nann Jisas Kraisr aposer hingrneft fak htamor. Ndar gontwat nann wandfakhato htefiwant. Niko Bro Nkifrarhu yufatpno bi ruhet yimako, nikompno ndar gontwat niewut. Niko frohko rpen rpen natubatunihato Pontus tohwako, niko frohko Galesiat toh-wako, Kapadosiat tohwako, Esiat tohwako o Bitiniat, nd nd profinsm tohwako, ndar gontwathu mrokfom wahtitwakomm. Nd kmim niko toh-wam womroh kmiyem. Hefenr tor, tukmoh tohyuk kmir. ²Bingot Bro Yifemr rhuhato rorhu dukeft bi wuri wuri yimot. Bi htimort nikmoh yak htayuk yihotat. Bi hti htatahato bi rorhu yufatpno fak dbkaf htamorko. Memor, "Kto nanhu yonm rhurahm." Bi rorhu yufatpno yak dbkaf htayet-komn

turhu Yafothat niahato tu Jisas Kraisr kanjo fak htamorko. Memor, "Inji yak htahato Jisas Kraisru mrokfom hikrahm." Kraisru kkupam kfomom nikmoh yima rifhum yak wus bowushato Kristenko tohmoko. Bro Nkifrar hti yuhuwafhato nikmoh yima yuhum minoh hmbrehato yak marnya bomarnyarahrm.

Hefenrn tu dborioh toh nmbuhat yakrahko

³ Akfo yindhor boyindhornomr Bro Nkifrar, nmoh Nungothet Jisas Kraisru Yifemr. Bro Nkifrar nom yuhuwafhato Jisasr bi nohhato yopt ruhetr tfit kasinyamorr. Jisasr yima nfrir tfit tohhato nfri dborioh rhu nmbuhat he hanitrnom. He hanyhato nom htitwa-nomn nmoh yima yuhum sinyewum Bro Nkifrarparhu yakinohhato hikneft. ⁴Nmoh dukeft duka kangnom, bi rorhu yon mifenom. Nmoh yufatpno rhuyuk wuskam Bro Nkifrar kakitoh-wormko hefenrn. To nhai finji na-ruhatm. Be inji rhu hanyrahm. ⁵Bro Nkifrar tu nngrajoh Nkifrayer. Bro Nkifrar yakinohhato hikwatkomr kuka-tohafo hanitrko. Rorn toh natwiworko. Nhai wom tamohm niko finji nakfot. Be inji rorn toh natwi hanyruharko, ee Jisasr nierahr. Niahato tfit rorn miyakruharko yak marnya bomarnya-rahrko.

⁶⁻⁷Jisasr niko miyakruha nmbuhat wany yindhorwakomm yima yuhum tohetohwomko. Ndt rot hifa nmbuhat. Nd krhopenm Bro Nkifrar yahukam, to mirahko niko ndm mhtiyakhato tfit amthu youtanom. Nhai. Nd krhopenm niko Bro Nkifrar yahukohat kangr, "Afo ahtianm, toh bmtarahm o nhai." Kraisr yakinohhato hikwa nmbuhat gorharoh hingrneft kanjo inji kitwot. Yimar gorham yekwohat yuht nungur fukayett kekwort. Kto tfit kahe tariorh hnutr. Tariorh hnuhato nd nungur fukat yak thuwart tu fnhuyet gorha mifrpam kekwor. Bro Nkifrar hikwa yimaroh toheft to inji korht. To mirahko Bro Nkifrar ka nd gorham wofnwor. Nhai. Ndm rom bbinysoftpno mibatiniyukem. Ror niko yakinohwa dukeft ndt hti hanitrt. Nd krhopam yakruhakomm nikmoh toheft toh bmtarahko. To hifa. Nd krhopam niko yakmom, nhai yima yuhum krhormomko. Nhai. Jisasr yakinoh bmtahato tohmokomm yindho-refrpno tohmoko. Ndm bi hti htamormn kto Jisas Kraisr yawihnehato yimam htiyak thoft be tu bro yufat hirahrko yo bro yindhor nmbuhat htarahrko yo nikmoh yufam yura yura yutahato kfo yindhorrahrko.

⁸⁻⁹Jisasrpno yima yuhum yitahat nhai yima nyingatikm htihato yima yuhum be rorhu dukefrn rhukahm. Nhai. Yo rorpno bro dukefm htewohat nhaf inji. Nhai yima nyinga-tikm htihato inji nakahko. Nhai. Nikmoh bro dukefm Jisasrn kitm, ndnatn Bro Nkifrar kak hanitrko. Inji newatrko bro yindhorefrparpno korhko. Nd bro yindhor rifhur nikompno yorhwar be tu bro yindhor rifhur korhrko. Nhai finji kfo hikkfot.

¹⁰Bingot bi profetm kfo ptha htamomt ndar rhu nmbuhat niko bi yekwat. Kfo ptha nhta bonhta me-moum, "Bro Nkifrar nko fitoh yuham

tfit yakmiyakruharm?"¹¹ Bro Nkifra-rhu Yafothat nd profetm mthu nawoh-moattm kfo memoum, "Kraisr krhopam yakrahr, nhai be rpahtet krhopam yakruhatr. Krhopam yakruharn kto tfit bro yufat yakrahr." Kraisrhu Yafothat inji kfo nuhasmoattm, tfit nd profetm kfo ttiwon hta memoum, "To nd yimare fitoh yiha nieruhar? Tone krhopam finji finji yakruhar?"¹² Inji ttiwonmoatm Bro Nkifrar kfo memorm, "Na hingrnaruha hingrneft nhai bi nikompno hingrnarhotant htiruha-komt. Nhai. Kto nikmoh mongko. Kto ndar bbinysort nia tohruba yimam, romn nd neft htirahmt." Nd gutnius mrokfom, yimam hnehato kfo nuhas-wam, ndmn kfomor. Bi Bro Nkifrarhu Yafothat yawihnehato yimam thu nawoh hanitattm romn nd mrokfot miyaknihato kfo ptha nuhas hanitatmko wany hanitwokomm nd gutnius mrokfom. Mounmotm rom nhaf kangm, "Nd gutnius mrokfot afo awany hik bohiknomm."

Bro Nkifrar tur tohwa toheft kanjo tohneftn nakumornom

¹³ Bro Nkifrar duka kangr, "Athu nhirakkahanm tukanhu toheft toh hikrahm." Ndnett nikkoh yima yuhum yak hta bohtatahato nikmoh wiyauyau nmbuham dukefmpno yaufkot. Bok dukefm yak duha, rpa yima yuhurpam rhukfot. Rpa yima yuhum rhuhato Bro Nkifrar mekaht Jisas Kraisr yak hfhanafohato moun yuhat yawihnehato tuhant yindars tafont nytinga rihar wuhiyak thombat, nd yiha Bro Nkifrar yakhato yak marnyarahhrko. Nd dukeftn yakinohkfot.¹⁴ To be niko Bro Nkifrarhu dukeftn rhukfot. Bi Bro Nkifrarhu yoneko bi. Ndnett mirahko tfit Jisas Kraisrhu mrokfom tafi wany juha na hnamo nefm tfit nd nefm ananom.¹⁵ Bi Bro Nkifrarhu yoneko. Bi turhu yufatpno fak dbkafmorko. Ndnett niko yonko be turhu toheft toh hikkfot. Nhai kspitafat rim tohkfot. Nhai. Mar tafont tohkfot.¹⁶ Nkifra rfa borngt Bro Nkifranko kfo memor, "Na Bro Nkifraya mar tafont tohwa, niko to inji mar tafont toh bugakfot."

Nmoh fasoh fasoh nefmpno Kraisr suh nanyormornom

¹⁷Hefenr tor nmoh nkifra kmir. Bro Nkifrar tor nmoh Yifemr. Ndnett ndar bbinysort tohneft be rorhu yinhitn toh hikkfot ndar bbinysort tohwa yifemrom toh hikwa kanjo. Nd Yifemr nhai nom yakitohwa yufam o hingr-nefm o tamohm ndm htikahr. Nhai. Yima buganom rpahtet yukatoheft kukatohwornom. Ndt tu dborioh neft newur.¹⁸ Bi nikmoh nkifram toh hawihnamo nefm ndm fak hik hna-moko. Nd nefm bi Kraisr suh nanyor-morm. Nhai foahn o nunga krirn nohrmor. Nhai.¹⁹ Kraisr suhhato kkut yohnemot. Nhai rorn wom nefm nahato suhrmor. Nhai. Mgogra yimar, be nmoh nefmpno suhmor.²⁰ Nmoh fasoh fasoh nefm Kraisr tkitt yakhato nohneft, ndt Bro Nkifrar mounti bbinysort tafi hingrna hta duha nd dukefr bi duka htamorr. Nda tu wuroh yihampno Kraisr niahato yima rifiny buharn suh nanyormor.²¹ Kraisr nohmot

tfit tu Bro Nkifrarn bi yopt ruhetr tfit kasinyamorr. Kasinyahato bro yufat hemorrh. Nd mrokfom bi wanyetkomn Bro Nkifrar kakitoh-wokomr. Yakitohhato gari hasiwuko Kraisrhu nia miyakneftn. Kraisr miyakruharko hifa rhu nmbuhat yak htarahrko.

Bro Nkifrar hikwa met yindarim yak marnyakfot

²² Jisas Kraisrhu gutnius mrokfom, yafothayet mrokfomn wanyhato hikmokomm. Hikhato nd fasoh fasoh nefm fafho thumokomm. Yafho thuhato yima rifhumio wutham rhumom. Yima rifhumio wuthamn dboriorh dukefmn yakhato niko tuko Jisasr hikwa tuhan yindariko najohfi yagnr tohhato tuko nayak marnyewuko. Nd neftn yakitoh hany yakitoh hanykfot. ²³ Nda Bro Nkifrarhu mrokfot rhu yakitoh hanyraht. Kto be inji rhu nkifraniraht. Nd mrokfotn nikmoh yima rifhumio rihringrnammottm toh nmbuham bi yewuri tpim kanjo frdborhamoko. Frdborhahato nfri yima yuhumpno tohwoko. Nd yewuri tpim rom mibatiniyukem. Bro Nkifra-rhu mrokfot rot be inji rhu nkifraniraht. ²⁴ Ndar mrokfot tu fipet mro-kfoyet. Nkifra gonborngt kfo memot,

“Nda bbinysof bugathu tuhant yindars
kiprt kanjo tohwom.

Tfa htewamn tfit yudbat tfam yohnitm.

Nhai wom rhu hatohkahn.

Yimam inji nahikrahm,

wondht mhatoh tefihato yudbat yohniraht.

²⁵ Bro Nkifrarhu mrokfot nhai inji naruhatt.

Rorhu mrokfot be inji rhu nkifraniraht.”

Aisaia 40.6-8

Nd mrokfot niko wanymo gutnius mrokfoyet.

Kraisr toh nkifraniruha rmon dany rahuyer

2 ¹ Bi gutnius mrokfot wanyhato nfri yima yuhumpno tohwoko. Ndnettn ariham be tmifko wayafho thukomm womroh duka bebnefm, kfo nhehnefm, kfo nheh furanefm, yo womm tngrpaye frnhehafnefm yo womroh hifa hingrneft o wuskam o tamohm hti yuhurhato yaknefm, yo kfo tukiohnefm. Nd nef bugam be wayafho thutwakomm. ²⁻³ Mirahko tfit nd nefm ayakitohnomm. Bro Nkifrar niwa dboriorh dboriorh nmbuham bi htieteko. Ndm htihato wahikkomr. Asomif yon hamboryenm wanurtahato mingat mnnefekwa kanjo Bro Nkifrarhu mrokfot wuyakhato yakitoh dbkaftakfot. Inji rhurahko nikmoh toh nmbuham nhai be rpahtet ruheftn rhuruhatm. Nfri nfri yima yuhum nia hneruhann toh bmtarahko.

⁴⁻⁵ Nikmoh dukefm Nungothet Jisasrpno htamoatko Bro Nkifrar inji htihato rorhu yufat rhuyuk yon kunys fak htamorko. Yak htahato rorhu rmont kanjo kasinyamorko. Womm rom nhai. Jisasr yakmomr rifak

htafmomr. Tu Bro Nkifrarhu yima yuhur ror Jisasrpar htamour. Ndnatn Jisasr yak-morr rmonthu dany rahur kasinyamorr. Niko rorhu yon kunys, niko wohnfa rahu nd ndeko. Niko Bro Nkifrarhu priseko. Turhu rmonthu hingrneft hingrna yimako fak htamorko. Niko lotuhato windoh nd nd nefm newam Jisasr yekwarm Bro Nkifrar wuyahukr ofakfot yahuka kanjo. Bro Nkifrar inji htihato yindhorwor.

⁶Buk Aisaiatn Bro Nkifrar kfo memor,

“Wawanyko! Nanhu yon kunys wom kingr
dany rahur kanjo kasinya-ruhanr.

Rorrpar titarahrm.

Rroh dukefm rorparpno hta-ruhamn
nhai suhhato haninge-ruhatmm.”

Aisaia 28.16

⁷Rorrpar dany rahur tohhato hatoh-worko. Nikmoh bro dukefm rorpar kitm. Wom womt, rom nhai dukakahmr. Nhai nd dany rahurpno yakitohhato tohkahm. Aisaiar kfo memor,

“Nd rahur, kamda yimam hti kurhato yak thumor,
be bi tfit nd rahurn bi dany rahur tohwor.”

Sng 118.22

⁸Tfit wom mrokfot memor,

“Nd yimar Bro Nkifrar htewa tahiyer.

Nd tahirpno wuram mfrgu-ghato suhwom.”

Aisaia 8.14

Jisasrhu mrokfom yekwamm Riyak htefiwumm. Inji newamn suhna-suhwom. Bingot Bro Nkifrar rhuhato bi htitamort yimam myahot bani suhuha tkitt.

⁹To niko tu Bro Nkifrar bi turhu yufatpno fak dbkafmorko, niko tur kanjo tohwa kmiyeko. Niko nd kmikomn bi fakngotmor king kanjo tohhato pris hingrneft yakinohneft. Nikomn ror hingrnayuk hingrneft htihato kfo nafhur htifikfot. Niko kspitat ruhetko ror rimakhato turhu bro nanyjaret nukafat rim htamo yuhat to tfit nikomn nd ror nayuk neft kfo ptha nafhur htifikfot. Inji nayuk-komn fakmorko. ¹⁰Niko nhai bi Bro Nkifrarhu kmiko rhurmoko, arihat bi Bro Nkifrarhu kmiyeko. Niko afo nhai hti yuhuwaftato yak marnya hna-rmorko, arihat bi kak marnyahne-wurko.

Wommpno tohneft nmoh yau nmbuham be yau marnyakfot

(Sapta 2.11–3.22)

Nom Bro Nkifrarhu hingrna yimanom kanjo tohkfot

¹¹Bar yinouroko niko nndo wom kmi thofko ndar bbinyssoft tohwako, hefenr tor nikmoh tu kmir. Niko kmiyakmiko bbinyssoft tohwohat mirahko yima yuhum wagrha sinyekwa fasoh nefm ahiknom. Yima

yuhum wagrho sinyekwa nefm yak hatohaforuhatmko fasoh tkit bebt
riyahko.¹² Niko Bro Nkifrar hik duha yimampno tohwoko, niko be yak
tehhato toh marnyakfot. Nd Bro Nkifrar hik duha yimam, romrpam kfo
wokwomko o faso faso kfo beb-womko, niko dborioh neft hikhato nhai
tawo kfowok inji narfokomm, nd tkittn kto ndar bbinysofthu bati yihar
tfit Bro Nkifrar kfo yindhore mirahmr, “Bro Nkifrar hiket yimam dborioh
nefm newum, nom nhai.”

¹³ Bror mdukakhato nda bbinysoft tohwa gafman yimam htayuk lokfot
hikkfot. Romr tohwa kingrhu yinhitn toh bugewum kmi kmiroh tuhant
yindars. Ndnett rorhu mrokfom hik-kfot.¹⁴ Profins tohyuk gafmann,
ndm buga rroh yinhit tohkfot. Nd yimam kingr kak htewurm. Fasoh net
fasoh net yimam romn yekwamm kalabus htewumm. Dborioh dborioh
nefm nayet yimam kfo yindhorewomm.¹⁵ Bro Nkifrarhu dukefr duka
kangr niko be dborioh nefrpam wanakahtko, nd niko faso faso kfo
bebwu yima dukef duha yimam inji htihato nhai tfit wom ptharuhatm.¹⁶
Nkifra boririfhut niko yak nhirtamoat bi frtmbho thumort Jisasrn.
Nhai nd boririfhut wom yakitohkahtko. To mirahko amanyom, “Nhai
mrokfom. Nhai bi boririfhut yakitohkahtnom. Ndur nefm nanefm nhai
mrokfom.” Ndm fasoh dukefem. Jisasr nd fasoh nefmn mrhumotmr
suhmor. Ndnett nd fasoh nefm yafho-hato be Bro Nkifrarhu yinhit
tohkfot.¹⁷ Wom yima fura bofuram dborioh dborioh nefm yak nuhaskfot.
Niko Jisasr hikhato tohwako niko tuko najohfi yagnr tohhato Nayak
marnya-kfot. Bro Nkifrar duka yakrmihato rorhu yinhit tohkfot. Yo
Kingroh mrokfom hikkfot.

Kraisr bi fak nuhasmornom krhoparoh yakneft

¹⁸ Niko hingrna yimako, fitoh yimar tohukatohworko to be nd
tohukatohrhу yinhitn tohhato rorhu mrokfom hikkfot. Nd tohak yimar
fasoh yima kfeter niko to mirahko rorhu beb nmbuhuat htihato tawo fasoh
nmbuhuat ayak nuhasnomr. Niko be dborioh nmbuharpampno tohkfot.¹⁹
Niko tu Bro Nkifrarhu dukefr hikhato dborioh nefm newatko nikmoh
tohak yimam htihato frtabotwomko, niko be tha hekfot. Inji narahko
Bro Nkifrar yindhorehato kto yak marnya-rahrko.²⁰ Tuko mmohato nd
tohak yimaro tngm nhai hikrfotkomm frtabottmko, nhai toh kekutni
tawo frtabotrfokomm, to ndte Bro Nkifrar finji dukaruhart nd neft?
Ka duka mirahr dborioh neft neko? Na kanga ka nhai. Nd neft tukmoh
mmo nmbu-hatn frtabotmko. Rote, dborioh nefm netko frtabot furetmko
nhai toh kekutni tawo frtabotrfokomm, tot nd neftn Bro Nkifrar hti
yindhorew.

²¹ Dborioh yimako wom yimam tat furemkon o finji nemko, to niko finji
kforuhako? Bro Nkifrar to nd neftn nakumorko. Kraisr to niko dukahato
krhopam faktmor. Nd krhoparoh yak yuham to bi turn fak nuhasafmorko.

²² Jisasr krhopam yakhmohat, nhai ror wom neft mnarmotr nd krhopam yakrmor. Ror nhai wom yiha kfo furarmotr wom yimar wanymorr. Nhai. ²³ Kfo tfar botfar thumomr ror nhai finji kformor. Yonmar yonmar krhopam titamorm. Rom inji namohat nhai kfo yanho mrokfot kformorm. Nhai. Nd rom nayuk nefm Bro Nkifrar-pno htamorm. Bro Nkifrar tu dborioh jaser. Ror duka marnya bomarnyahato tamoh tamoh mrokfem kakitohworm. ²⁴ Nmoh fasoh fasoh nefroh krhopam Kraisr yura bgre mis fakmorm. Bi Kraisr nmoh fasoh nefmpno bgre misn nohmotr ndnettn nd nmoh fasoh nefroh nammo bammoneft yafhohato toh marnyakfot. Ror harhumo fhu bebt kfomot nmoh fasoh nefm yoh-nemom. Yimam Jisasr frtabotmo nmbuhatn Bro Nkifrar fak marnya-morko.

²⁵ Sifsifm kanjo frfnah wurasoh-hato fau mmo bammo htfasmoko. Tfit arihatn sifsif tohukatohwa yimarpno bi tfit nia tohwoko.

Bi nayaket tuhan yindariroh mrokfom

3 ¹⁻² Hingrna yimam turoh tohak yimaro yinhih tohwa kanjo niko metko bi ram yakhato ramemrom-pno yorhwako niko be ramemroh yinhih rhukfot. Wom yimam tafi Jisasr hik duhatem niko rroh metkomn rroh yinhih rhuhato tamoh tamohm dborioh yima yuhumpno kfo ptha marnya bomarnyarahkomm, tot nd tkittn nikmoh ramemrom htiruhann rroh yima yuhum yak kekuthato Jisasr hikrahm. ³ Niko Jisasr hikwa metko, rot hifa tmarim, tirm, wuram, yimbhindangm wondhet bugam korhm yo wondhet wondhet wuskam hmbrtiko, rot hifa inji wondh hta bohtewuko. To be mirahko be nd thatiproh wondhyuk wondhrpat aha-tohnom. Nhai. Kangko awondhkahtnom tukmoh yindarim ahti yindhormnom, wawanyko. ⁴ Tukmoh yindarim be dborioh yak marnya bomarnyakfot. Tamoh mrokfom napthorahnom be hifa yima yuhumpno rhuhato naptha marnya bomarnyakfot. Nhai be mfro mfro bahbahnakfot. Tom ndhtet ruhefm yima yuhum wondhkfot. Bro Nkifrar ndhtet nefmn hti yindhorwor. ⁵ Bingot Juda efkotm nhai thatiproh nefrpamn wondhrmoam. Yima yuhuroh nefmn wondhmoam. Rroh dukefm Bro Nkifrarpar yimoum, nhai riduka adukarmoam. Ndhtet dukefmpno tohmoamn rroh yindarimpno rhu marnyahato tamoh tamohm dborioh dukefmpno rhuhato napthamoum. ⁶ Serat rhumo rhu nmbuhat fak hik-mom. Serat tuthu ramem Abraham-rhu yinhitn be tohmout. Yufat yutamoahat futamoutr, tohukatohr. Niko Serathu nefm hikhato womm kak marnyewukomm yo nhai wom tamoh tamoh nefm duka yakrmikahko to bi Serathu yon meteko.

⁷ Niko yindariko bi metetko, mirah-ko metm yakhato arituhافتانوم. Nifn met yindarfni bi rpa yefn nhai wom husfn rhukahfn. Niko yimayeko yo rom yimayem ndnettn nayak marnyahato rpat tohkfot. Bro Nkifrar hiruha dborioh rhu nmbuhat nhai ni yindarirpa yakruhatnt. Nhai. Mett

rot nd rhu nmbuhat yakrahtt. Yindariko metmpno toh marnyahato tamohm kfo bruttnaneft nhai wom tamohm hta raforuhatmm nikmoh kfo bruttneft.

Wommpno yiha yiha dborioh nefm nakfot

⁸ Wuroh mrokfot kforuhant. Niko Kristenko tir nayakitohhato rpa yima yuhur tohkfot. Womm yakyuk krhopam hti dukahekfot. Nahti marsisa duha. Yima najohfi kanjo tohhato nahti yuhuwaf nahti yuhuwafhato hifa yima yuhum nahmbrekfot. Noh hmbre yima yuhum tohhato tuko dborioh nefm nayak nuhaskfot. ⁹ Wom yimam fasoh nefm newumko mirahko tfit fasoh nefm ananomm. Mirahko tawo tawo fasoh nefm annhenom. Womm inji newumko niko dborioh nefm nakfot. Bro Nkifrarpano kfo bruttnahato Bro Nkifrar yak marnyarahrm. Inji narahko Bro Nkifrar yak marnyarahrko. Ndhtet dborioh nmbuhamn nakumorko. ¹⁰ Bro Nkifrarhu rfa borngt kfo kangt,

“Fitoh yimar kangr toh marnya-hato hifa rhu nmbuhat kto ahtiya,
nd yimar mirahr womm faso kfo beb bobebanm yo mirahr womm
akfo nhehanm.

¹¹ Nd yimar fasoh nefm mong trohhato
dborioh nefrpam hikkfot.

Wommpno nhai nnakfo baboba inji nakfot.
Be hifa dborioh yima yuhumn nayak marnya hanyhato
rpat rhu marnyakfot.

¹² Nd mrokfom nhai be sfno inji kfokahm.
Dborioh metm o yindarim Brorko toh tamnourahrm
rroh wiyauyau toh nmbuham.
To tfit nd metm o yindarim toh nmbuham faso tohwom,
ror nhai toh tamnoukahrm rroh wiyauyau
toh nmbuham. Nhai.
Hti namburworm.”

Sng 34.12-16

Dborioh nefmpno krhopam yakneft hifa

¹³ Yimako dborioh dborioh nefm narahko, nhai wom yimar yak
beb-ruhatriko. Nhai. ¹⁴ To dborioh nefm niwatko womm kangm finjina
finjinemko ndt to nhai mrokfom. Be yindhorkfot. Mirahko ayakrmekah-
nomn bok dukfm ayaknom. ¹⁵ Kraisr nmoh Nungotheter, rorhu
mongko mitohkfot. Rorn toh raforahrko tamoh nefm. Niko dborioh rhu
nmbuhat toh gari hasiwa nmbuhat kfo ttiwonwomko, kfo nuhashekfot.
¹⁶ To mrokfom kfo ptha nuhasheneft, mrokfom be duka marnyahato
dborioh yima yuhurn kfo nuhas marnya bomarnyakfot. Mrokfom faso
faso kforahkomm, tfit tuko yima yuhum krhorahmko. Mrokfom hifa
kforahkomm, nd yimam niko Jisasr hikwa nmbuhatpno faso kfoyukm

niko pthayuk mrokfom wanyruhamn tfit tum yimtnarahm. ¹⁷Be tunmoh dborioh nefmpno Bro Nkifrar kangr krhopam wayakko, a to nhai mrokfom. Bro Nkifrar ndt yindhawor. Tunmoh fasoh nefm krhopa yakneft, ndt Bro Nkifrar nhai yindhorkahr.

Nmoh nrfa htiyakneftn Kraisr nohhato tfit sinyamor

¹⁸ Kraisr nohmo yuhat dukakfot. Kraisr nhai wom tofspno wasrmomr. Nhai. Nmoh fasoh nefm rorn yakmorm mfha htamorm. Rorn mfha htamotr be nd gribt wafakmot. Bro Nkifrar nhai bi wom mrokfom nompno. To be nd yiharpa nohmorn to be. Nohmohat thatiprpat nohmot. Yafothat nhai nohrmot. Yafothat rot rhumot. ¹⁹ Yafothat rhuhato Maringour yimot. Maringour yihato Maringour kalabus tohyuk noheh yimaroh yafotham mrokfom hemorm. ²⁰ Nd yafotham nhai be sfno ndha toh furarmom. Bingot Noar sift hingrna hanyhato Bro Nkifrarhu mrokfom kfo pthamoahat nd yimam hanyjbornamoumm Noar pthayuk mrokfom. Nhai wany yakio-hato hikrmomm. Hanyjbornamoahat Bro Nkifrar nhai bi finji narmorm. Noar sift hingrna hanyhato Bro Nkifrarhu mrokfom kfo pthamoahat, 8-pela met yindairpam nd Noar hingrnayuk sift fknimomn nhai bro hnut fune habohirhato miptkormom. Wom womtn bati bugamom. ²¹⁻²² Nd tekt be kfo nhombra mrokfoyet. Bro Nkifrar ndar yiha hingrnewa hingr-neftu kfo nhombra mrokfoyet. Ariha yimam baftais yekwohat, nd yiha Bro Nkifrar yekwarm rorpno rim tohwom. Baftais yekwohat nhai yima kifthu yukthuneftn yukkanhm. Nhai. Yimam Jisasr Kraisr hikhato rorhu dborioh nefm hiketm, baftais neftpno wom womm kak nuhaswotm ror Jisas Kraisr hikwa yuhat. Ndt nhai be sfno nd hingrneft rhukaht nhai. Nd baftais hingrneft mnetet. Jisas Kraisr nohhato yopt tohmohat Bro Nkifrarn kasinya-morr. Ndnett yimam Kraisr frtkaf-hato baftais yekwohat Bro Nkifrar kasinyewarm rorpno rim tohwom. Jisasr nohmohat Bro Nkifrar kasinyak-nimorr hefenr hamuhmorr. Hefenr hamuhhato bro yufat hemorr. Bro yufat hemotrr nd yufet mounmotm, bbuket mounmotm rorhu yinhirpat tohwom.

Kristenm bkra kaht kanjo fknitm

(Sapta 4–5)

Yatk yima yuhur yafhokfot

4 ¹⁻² Nmoh fasoh fasoh nefmpno Kraisr yonmari kku bebt hatoh-mort. Niko rorhu tat yima yuhur yakhato nd yonmari bkra kahm fknekfot. Mirahko yakrmanyomm. Tpi yakyuk tkitet. Nd bkra kaht bi ftoh-nikomt, to be nd tkittn ndar bbinysoft toh thombat be nhai tfit nd yatk yima yuhum tfit uhatonehatu suh-ruhatko. Be Bro Nkifrarhu dukefrpar

hikhato tohrahko. ³Bi nd yatk yima yuhumpno tohhato nd kspitat tohyuk yimam niwa nefm bi nahna nahnamo-kommn bi na buhtamokomm. Rom niwa nefm be tu fasoh fasoh nefm newum. Yima yuhum wasinyak thombat nhai tu dborioh nefm nakahm, drinkfot yakhato drink spak-wom. Yemrot, drinkfot hta burwewa tkitm yitamn yemrot yehany yehany nhai bmbri ye smbhonikahm, drinkfot yakhato drinakni thombat nhai bmbri mdrin tmbhonikahm. Yehany drinhany yehany drin hanyhato bro yindhoreft yekwattm yima yuhum be yura hirhato btn tum tawo tawo nayakni hanyhato nhai tu dborioh nefm nakahm. Inji newamn be ndha rhu nkifrangotefiwum. Bro Nkifrarhu kfo yirmoh mrokfom nhai hikkahmm. Turoh tahi yifonm yakhta ndmn kfo bruttnewum. ⁴Nd rom niwa nefm be tu fohm nhombre-wum. Fohm turoh foh swo brongm yihato yuk kekut bokekutwa kanjo inji fasoh fasoh nefm newum. Niko rom niwa nefm nhai brbo yihato htikahkomm. Niko rom niwa nefm yi hti duha yitatkomm kfo ptha kangm, “Tamoh dukefmpno nom niwa nefm nhai yi htikahmnom?” Ndnatn faso faso kfo rindho borindhiwumko. ⁵Kto tumn kot tohruhamn Jasn kfo nuhas hik bohikrahmr, rom niwa nmbuhat. Nd kot yakitohyuk yimar bi yak htatetr korhr. Rorn wanyrahrm arihat tohwa yimami noheh yimaro kofot. ⁶Nd dukeftpn Jisavr Maringour yihato Maringour tohyuk noheh yimam gutniuskfot bi mikfo ptha nuhas tanymorm. Kto nd bro kotkfot yikitohruha yiha nd noheh yimam sinyaruhamn rpat nd yima nfrimpno kofot rpat tohrahm. Fitoh noheh yimam Jisavr miptha tanyuk gutnius mrokfom wanyhato fakitoamm, nd yimam Bro Nkifrarpn hefenr tohrahm.

**Niko rpa rpa yimako Bro Nkifrarhu Yafothat
rpa rpa nefm he nhombra hanymotko**

⁷Ndar bbinyosothu bati yihar bi brbohwor. Ndnett yima yuhum duka marnyahato yak hta marnyahato. Yak hta marnyahato kfo bruttnakfot. ⁸Tu bro nmbuhat nikko Jisavr hikwa yimako tuko nayakitohhato rpat toh marnyahato. Inji narahko be nhai wom tamoh nefm rhuruhatmko. Tamoh tamoh nefm rhuneft nhai be krhoni-ruhatm. Yudbat yak dbhofnarahkomm. ⁹Bro Nkifrarhu hingrneftn wom yimam newum nikmoh kunym yakkfot. Mirahko kfo mari hanyhato ayaknomm. ¹⁰Niko rpa rpa yimako Bro Nkifrarhu Yafothat rpa rpa hingrneftm he nhombra hanymotko. Tuko Kristenko nd hingrneftm yikitoh-hato tuko nahti duka nahti dukakfot. Yafothat hayuk hingrneft mirahn be tuhaftahato arhut. Nhai. Tamoh hingrneft fahurn, hingrnakfot. ¹¹Bro Nkifrarhu mrokforoh kfo ptha htfasyuk hingrneft fahurn, to be nd hingrneft yikitohkfot. Bro Nkifrar kfo famur, “Ndar yimann wom yimam tamoh tamohm yibonwom o finji newum ninn yihato wanyhekfot o htihekfot.” Ni frohn nd hingrneft fahurn, tu Bro Nkifrar hayuk dukefmpno nd hingrneft hingrnakfot. Inji

hingrna hik marnya-rahko, riruh aruhuk yimam htihato Bro Nkifrarhu yufat yura yura yuta yindhorrahmt. Yura yura yutaruhatmt be rorhu yufatn broniruhatn be rorrpar tamoh tamohm nyngako tohruharn be tohhany, tohhany, tohhany, be inji toh nkifranirahr. Be inji rpa.

Yindhorkfot Kraisr kanjo krhopam yakneft

¹² Bar yinouroko, mirahko nd bbra kaht niko tohwat yironahato aduka amanyom, “Barenko, nome ndar kahte tamohmpno yi tohwanomt?” Inji kfo duha. ¹³ Jisasrhu yufatpno yi tohwatko nd krho mis titewuko Kraisr krho mis titamo kanjo. Ndnettun krho mis titewohat be yindhortpno titahato warhutwako. Kto Jisasr turhu bro nukeft mihatohhato tuhant yindars htiruha yiha, nd yiha niko be tu bro yindhoreftpno tohrahko. ¹⁴ Niko Kristenko wom yimam kfo bebwomko, nhai mrokfom. Bro Nkifrar inji htihato kak marnyewurko. Nhai be sfno yak marnyakahrko. Bro nukeft hatohet Nkifrarhu Yafothat toh natwihwotko. Ndnettun niko yindhorkfot. ¹⁵ Yo! Niko Kristenko, nom mirahnom ka hifa kfoyet nikmoh womr sinyaniruharn yima wasrahr o rikohrahr o raskor hingrneft yirahr o womroh hingrnfem o tamoh yak nhta tkitm rim rhuhato yukatoh hanyrahr. Nd nefm narahko to be tukomn tfit krhopam yakrahko. ¹⁶ Niko Kristenko be krhopam fak fureko, niko mirahko ayimtna furanom. Bro Nkifrar kfo yindhorhato nikmoh yufa wasarem Kraisrhu yufat yuta yindhorkfot.

¹⁷ Bro Nkifrar yakitohruha bro kotkfote, finji kforhoyant? Arihat nom Kristennmoh mrokfomn bi rhuhato kot kakitohworm. Nmoh mrokfom yakitohhato nmoh toh nmbuhat bi kak susnewurm. To Bro Nkifrarhu gutnius mrokfo hanyjbornayet yimamne finji naruham? Be nhai wom yihotam, be kaht wundiat riyahm. ¹⁸ Ndt tu kfo mif kfoyet. Buk Sindauntn mrokfot korht. “Fitoh yimam Bro Nkifrar hik-hato bbra kaht yitohtm, Bro Nkifrar fekrm, tone nd hanyjbornet yimame finji naruham? Rom be kahtn wundiat riyahm.” ¹⁹ Bro Nkifrar bi turhu nyngaye bi htihato kfo famur, “Niko, nd nd yimako mrokfetko rhurahko.” Bi inji htihato kfir, nd yimam yudbat rroh yima yuhum Bro Nkifrapno yak kekuthato dborioh nefrpam yaukfot. Tu Bro Nkifrar hingrna htamornom. Yiha yiham hti yukatohaf hanitrnom. Tamoh krhopam nianeft turn thu bmtarahrnom.

Niko eldako yikitoh marnyakfot Bro Nkifrarhu met yindarim

5 ¹ Na Pitaya. Na sioshu eldaya. Nikmoh siosroh eldam hingrnewa hingrneft ndt hingrniwa. Na tukianhu nyngaye htimoyanr Kraisr krhopam yakmohat. Kto Kraisr yawihnehato met yindariroh nyngi riarpno bro yufat yak thombat, nd yiha niko bro yufam yak hanyshombat na rpat nd bro yufam yakrahnom. Ndnatn niko eldako wom yima yuhum kahukanko. ² Bro Nkifrar

hikwa met yindarim niko eldako yakitoh marnyakfot tukmoh yonm yakitohwa kanjo. Nd Kristen met yindarim nikmoh tirmn korhwom. Ndnettn yakinoh marnyakfot. Mirahko nd elda hingrneft ahreknomt. Yo mirahko be mfro maru hingrneft kanjo nd hingrneft achingrnantomt. Nd hingrneft be tukmoh yibon yima yuhunn hingrnakfot.³ Mirahko tukmoh bro yufam dukahato Kristenm yiham toh mtih yinomm. Nikomn dborioh nmbuhat htahato Kristenm htihato rom hikrahm.⁴ Kto Kraisr yawihnehato met yindarim tafont htiyahkato sifsifroh tohak yimar kanjo met yindariroh tohukatoh yimaroh tohak yimar toh thombat nd yiha niko eldako tu hifa dborioh rhu nmbuhat htirahko. Yimam wumt resishato win praiskfot yekwa kanjo inji dborioh rhu nmbuhat yakrahko. Nd rhu nmbuhat nhai bmbri rhu tmbhoruhatt. Nhai. Be inji rhu nkifraniraht.

Nom Bro Nkifrarhu tirtn rhukfot

⁵ Niko damiag yimako, niko eldaroh yinhim tohkfot. Mirahko yura amtoh-nomm. Tuko nahti duka nahti dukakfot.

“Yimam be mfro turoh yufam kfo hagrhem,
Bro Nkifrar nhai hifa yima yuhur hmbrikahrm

Noh hmbre yima yuhurpno ruhetm,

Bro Nkifrar hifa yima yuhur hmbritrm."

Sindarin 3.34

⁶Ndnettñ nikmoh yima yuhum yak karhuhato be dborior yima yuhum rhuhato Bro Nkifrarhu yinhtin rhukfot. Inji nahato wom yiha Bro Nkifrar nikmoh yufam yura htarahrm. ⁷Bro Nkifrar hti dukewurko. Ndnatpno nikmoh dungunangunefm wahitwakomr.

⁸Nikmoh wiayaua nmbuham dukefmpno yaufkot. Yima yuhum yak hta bohta marnyahato yimbhindangm tohetohaf hanyakfot. Nhai be sfno inji kfokaha. Satanr yau gronetr tohwor. Niko kmbruyenm kanjo gbeft yak hikaknihato kangr atadbofnayanko. ⁹Ndnettn nikmoh yima yuhum Bro Nkifrarprno htahato Bro Nkifrar yakinoh dbkafhato tohkfot. Inji nahato yima yuhum bmtaruhamko, nhai bmbri riwohsisakruhatko Satanr nia finji naknaneft. Nhai be nikomrpako ndhtet krhopam yakkahko. Wur fitoh fitoh tkitm tohyuk Kristenm be nd rpahtet krhopam kekwom. Ndnettn toh bmtahato frtfa thukfot. Riyoh bruyohak duha. ¹⁰Na kfo hta nuhaswa mrokfom hikrahko, Bro Nkifrar thu bmtarahrm nikmoh toh nmbuham. Bro Nkifrar yima yuhuwafetrn nd yuhuwaf nmbuhatn fakmorko. Memor yakhato Kraisrpno tohhato rorhu nukeftn be inji toh nkifranirahm. Ndnettn nd niko yekwa krhopam be inji ariharpat yakniruhakomm kto nikmoh toh nmbuhat yak marnyaruhart toh marnyarahko. ¹¹Nhai finji kfokfot. Rorrparhu bbukeft be inji rhu nkifranitt. To be inji.

Wuroh mrokfo nmbuhem

¹² Sailasrhu tire ndar gontwat yorhwa mrokfom wandfahemora. Sailasr nanpno tu brbo toh tamnouwa yimayer. Kanga akfo duka

tunguna marnyayanko. Mirahko ndar gontwat yorhwa mrokfom ka fura mrokfojem. Bro Nkifrar yak marnya mifahrko. Mrokfom yakitoh kihhato toh bmtakfot.

¹³Asha Babilon thofm, bi tu Bro Nkifrarhu yufatpno kfo htatamom, niko dukahato kfo yindhorkfot htefiwumt. Yo na yakitohwa yon Makr ror nhaf niko dukahato wom kfo yindhorkfot htefiwurt. ¹⁴Niko Kristen tuhan yindariko, wom Kristenmpno nakfo yindhorphato naki yindhorkfot. Tot tu Kristenm niwa neft.

Nhai mrokfefm, warhutwako. Niko Kraisrhu met yindariko Bro Nkifrar yak marnyatwarko.